

Piscadornan ta gradici Search and Rescue pa trabounan di Seguridad riba lama

Sala yen na Centro di Pesca Hadicurari reconociendo e importancia di informacion



ORANJESTAD - Diabierna ultimo 7 di september 2007, un publico grandi a atende un charla duna dor di Search and Rescue Aruba tocante seguridad riba lama na Centro di Pesca Hadicurari. Tabata señores Ruben y Adolf Croes, kendenan a elabora riba e historia di Search and Rescue Foundation Aruba (SARFA), e rekisito y recomendacionnan pa ekiponan di seguridad riba lama, mas varios otro aspecto interesante di nan trabou.

Di parti di e piscadonan presente tabata tin varios pregunta al caso y interes tabata halto. Por a tuma nota di varios señora presente cu a atende e charla. Esaki ta accentua e importancia di e famia pa piscado y nan rol den caso di emergencia riba lama. Organisadornan ta sumamente gradecido cu e desarojo positivo aki na cual señoreanan ta tumando un parti mas activo na e centro. Manera SARFA a splica durante e charla tambe, e informacion cu sernan keri cu keda tera suministra di esnan cu problema riba lama ta di suma importancia.



CONSEHONAN PA SEGURIDAD RIBA LAMA

Un di e consehonan di SARFA, a esnan cu ta sali riba lama, cual a keda enfatisa ta: semper percursa pa un persona riba tera tin informacion di e boto. Den un forma facil pa corda, SARFA ta recomenda esnan na tera, pa tin semper disponibel e siguiente informacion di e boto cu ta sali:

1. Unda e boto ta bai pisca?
2. Cuanto persona tin abordo di e boto?

3. Cu cua boto ta bai pisca (number/descripcion)?

4. Kico (medida di precaucion) tin abordo di e boto?

5. Ki ora e boto ta bolbe bek tera?

E informacion aki ta crucial pa bati alarma efectivamente.

Otro consehonan di SARFA ta encera cosnan chikito y practico pa tin abordo di e boto, cu por salba bida di esnan riba lama. Esakinan ta e.o. pinta e top di e boto color oranje, un radio VHF, Flares/smoke-markers, spiel, First-aid kit, Salbabida (1 pa cada persona abordo), paña

protectivo, awa y cuminda, un paña oranje pa .zwaai, flashlight, un drift anchor, bril di solo. Detayenan chikito tin ora ta haci hopi diferencia manera p.e. e recomendacion di SARFA pa semper laga e boternan di awa no yena completamente, pasobra si e cai na awa e lo sink si e ta completamente yen.

PISCADORNAN TA RECONOCE E BALOR DI SARFA

Piscadornan a gradici srs. Croes pa nan tempo y intervencion, como tambe a aplaudi SARFA pa nan trabou y empeño. E informacion brinda seguramente lo duna su fruto pa tempo nos dilanti. Como muestra di aprecio, sr. Pierry Croes, tesorero di Fundacion Centro di Pesca Hadicurari, na nomber di tur esnan presente y di tur piscador di Aruba, a haci entregá di un regalito pa e dos oradornan y un donacion simbolico na SARFA. E balor di salba bida riba lama y rescata boto den emergencia ta uno cu tin un balor impagabel. Piscadornan ta reconoce esaki y ta sumamente gradecido na tur e boluntarionan di SARFA.

